

房山縣志

吳春鴻題



房山縣志卷之三

古蹟

往不復者古也千古長存者蹟也山河依舊人傑而地自多靈歲月如流世遠而
名偏不朽賴蹟以存之也是以過古宮而見離黍可泣可歌尋往跡而話滄桑傳疑
傳信皆足以增高觀感振起衰頹古蹟之關於人也顧不重歟况房山地屬幽燕不
乏感慨悲歌之士山多名勝寧無耕釣隱逸之倫傳之金石者固宜廣為搜羅傳之
口碑何忍任其煙沒

漢良鄉城 水經注聖水南流歷縣即良鄉縣西轉又南經良鄉故城西又云防水出縣良鄉

西北大防山南東南經羊頭阜今羊頭岡下俗謂羊頭溪又東南至縣東入聖水良鄉舊

志引磁家務漫水以為池地理今釋云漢良鄉在今房山治東按水經在今大石河
東良舊志引漫為池似在大石河沿岸準其方向當在瓜市田各莊東蘇村西北者

然其址無存矣

漢陽鄉城 在城東南十八里豆店西蘆村梨園店二村東地在房山舊志漏載反入良志今增良鄉志陽鄉漢縣晉改良鄉齊初入薊縣後入涿郡地理今釋謂在固安西北豈陽鄉有二歟又俗傳城為竇建德所築考唐書高祖武德元年為夏王竇建德五鳳元年戊寅長樂王定都樂壽今獻縣初夏王取深冀易定等州又有得玄圭以獻者建德曰此天之所以錫大禹也乃改國號曰夏此城或建於是時歟

文靖書院 寰宇通志在房山西南七十里之抱玉里元里人總管趙密宣德府教授

賈壤常從容城劉因游歸以其學教鄉人乃建書院立祠祀之因以見其學之所從

來元賜額曰文靖書院國子祭酒高天爵為記舊志云已圯毀無存北上洛人楊葆

元謂在涑水赤土見高驥雲筆記饒樂府劉青綬謂在大石河之舊徐邨載在其所著房山景

物畧書中李恩惠續修房志料謂修自雍正年間引畿輔通志為據按上四說第一

說無可議第二說謂在涑水寰宇志云在抱玉里抱玉里房山地也且為里人趙賈

二公所建豈有在涑水之理涑水縣志並未登錄豈有此事而不記者云在涑水者

非是第三說云在徐邨以其塔爲文筆峯作解夫文靖理學家也塔浮圖氏喪葬墓表也以理學家而建塔於書院中必無之事也第四說云引通志修自雍正年間寰宇志已云圯毀無存矣卽令雍正年修之安有百餘年人人皆不知其遺趾者蓋通志修自雍正年李氏誤引耳總之地已無存不能考矣

雲峯書院

畿輔通志房山舊有義學在學宮旁雍正四年建後乾隆十八年知縣邱

錦建爲雲峯書院嘉慶十一年縣令黎德符邑人徐夢陳添建學舍備學租道光十五年縣令楊鉅源邑人李心蓮建講堂三間設山長以主講席設齋長以主諸務諸生肄業其間院外生亦可附課月兩試前列者獎賞以資膏火光緒十年添購經史光緒二十一年購新書改革之機伏矣光緒二十九年停科舉立學堂遂以其地改爲高等小學堂後更堂爲校而學風一變矣按玉海唐明皇始置麗正書院石鼓始置於唐元和白鹿始於南唐升元應天始宋眞宗祥符二年嶽麓始於開寶中其他若嵩陽茅山淮海湘西皆起自名儒不勝枚舉元時路府州並置書院各設山長一

人明則東林首善清則有金臺蓮池皆儒者研求學術之區菁萃人文之地俯仰之間已成陳迹

社學 舊志在北大街知縣陳庭訓重修不知創自何年清初駐防兵於此而學遂廢兵撤後官紳無繼辦者今遺跡莫考矣

懷玉鄉

元置四鄉懷玉其一今七八二區地也明頓銳隱此

見孫州志

名其山曰懷玉山並名其

亭自號爲懷玉山人張潮懷玉山亭記曰兩岸對峙如闕一徑通出入中廣十數里諸峯環立如玉筍然入崖北折而西萬木蒼鬱出林杪構亭巘嶸南負山北禪宇西南山皆嵌空攫拏翔舞蹲踞各極狀態簷溜瀉石壁積苔如斑下瀦流泉一泓泉側近亭按其地似在石窩以北雲居寺左近然未能確指矣

五侯村 距縣西南二十五里舊志謂後漢光武封王興五子爲列侯居此故名水經

注云易水出西山寬中谷東經五大夫城南昔王譚不同王莽之亂子興生五子並

避時亂隱居此山故其舊居世以爲五大夫城即此岳讚云五王在中龐葛連續者也易水東與子莊溪合水北出子莊關南流經五公城西逕其城南五公謂王興之五子也光武卽位封爲五侯元才封北平侯益才封安喜侯顯才蒲陰侯仲才新市侯季才唐侯所謂中山五王俗又以五公名居矣日下舊聞考引之以證房山之五侯顧炎武謂王譚並不封北平誤一王譚卒後歷王商王根安得不同莽政謬二仁已橫死五才何得獨脫謬三漢人少二名者王氏五世可見謬四封國何以不出中山之境謬五安喜蒲陰章帝所改謬六班范荀袁皆不及獨見太平御覽之河北記及此注謬七亭林斥以七謬而五侯之說破矣法苑珠林云五侯寺在范陽後魏有僧誦法華爲常業初死權斂隄下後改葬骸骨並枯惟舌不壞按此則村因寺而得名矣或謂光武旣無封王興子爲五侯事漢成帝河平二年夏同日封王氏諸舅譚商立根逢等五人爲列侯或即此耳然難以徵信

雙孝村 原名小營村人有高國棟者以母老而奉養乏人通顧册宋啓元妻王氏因

家貧賣身國棟出資購之王氏臨行泣曰去則去耳獨姑老染病在床我去誰爲侍者因割腕肉以進曰媳無以報只此一片肉耳遂昏倒于地國棟見而憐之不忍奪其志舍而去之並將其所出之資使人語之曰助爾奉姑毋還也王感高之義姑旋卒王遂歸高以養高母後高母病醫藥無效王與高共割肉以進母病立愈知縣羅在公聞其孝詳請扁額並捐俸立坊以旌之因改小營爲雙孝村（按割肉奉母本不足取然鄉愚出此亦誠難矣安得以愚目之彼鴟鴞其性者豈不愧哉）

瓦井村 在城西南十八里有村曰瓦井因村有古井彷彿以甕去其底自井下蟬聯而上接至井口村因此得名其水味甘涼雖亢旱不竭至今爲一村所寶元至元十年魏必復撰重修天開寺碑文有瓦井闔黎之名知其由來遠矣

皇后台村 天開村南龍王廟碑載此爲隋妃避暑之台考隋書煬帝紀大業七年四月庚午帝至涿郡臨朔宮八年正月辛巳大軍集于涿郡六月幸遼東七月癸卯班師九月庚辰至東都斯時蕭皇后隨駕年餘冥報記又載幽州沙門知苑精練有學

識隋大業中于幽州西山穿巖爲石室摩四壁以寫經又取方石別更摩寫藏諸室內每一室滿以石塞門鎔鉄固之時煬帝幸涿郡內室侍郎蕭瑀皇后弟也篤信佛法以其事白后后施絹千匹瑀施絹五百匹朝野聞之爭共施捨故苑得以成功后之避暑或在此時

金章宗歇涼台

舊治云城西

當云西北

二十里

當云二十五里

茶樓頂上遺趾猶存劉琴齋景物畧

云久就荒蕪苔階蘚礎橫臥榛莽中其址頗宏廠按靈峯寺在大房山陽長溝峪之北俗名上寺其碑皆隸書爲金蘇敬安撰今撮其畧曰房山南下三里泉石最幽奇處舊有梵宮肇自隋唐光啓（唐僖宗年號）二年重建遼中有章上人者聲聞朝省奏請名額取靈山靈峯之義勅賜令名時重熙十五年也後華嚴大師喆公官賜紫袍以旌妙行至皇朝開奠房山爲陵寢寺屬治內迨明昌改元復建崇聖宮白雲亭于峯頂潮海玉山桑乾在目莊產別業凡屬四區寺南之西乃長溝峪與長菴水鄰東臨鹿門峪栗林園圃尙存正南顧冊里實莊土之墟落良鄉縣北樂里下寺中庭

邇來華嚴法師信公能踵師武以本寺磴道西折棧躡飛梁躋于萬仞之上立碑所難加以澗谷幽闇深不見底古記以此淪沒無存今方伐石他山再揚厥美于昭無上託敬菴紀事者書石明昌五年重陽日按明昌即章宗年號想寺與台當同一地也又日下舊聞考云臺圯尙存四石柱

釣魚台 在縣西北十數里石梯坡西青龍背東背山面溪境頗幽勝明馮賢隱退垂釣于此山上有廟

龍門台 按寰宇通志去縣二百里上曰玉河台四面皆山其下澗深莫測南有龍王祠養恬筆記曰龍門台在三角山之西塘上之東畿輔通志縣志並入古蹟門其迄東一帶若四馬台在龍門台北云在東非莊戶台王家台石板台等處並不見記載蓋湮廢久矣台爲守望而設當時亦置軍戍深山荒嶠人迹稀疏太平日久遂復榛狂之舊按今土人常云一路十八台凡山灣處水必環其三面若土台然土人皆謂之台古人未必皆駐軍也

猷漢台 城東北十二里南礮村南有山名曰霧山其山恒多雲霧故名俗傳仙人著棋于此有樵夫旁觀久之爛其斧柯今有石刻棋盤樵牧者往往無心遇之有意尋之不能得也按此與廣輿記衢州爛山王質觀棋事相同要之皆神話時代人語不足信也

磐寧宮 按金史地理志奉先縣西有磐寧宮

瑞雲宮 按涿州志瑞雲宮在金太祖陵側遺址僅存按金史海陵紀真元三年三月乙卯命以大房山雲峯寺爲山陵建行宮其麓十月丁酉行宮成命名磐寧宮而瑞雲宮究不知建自何年或磐寧宮更名瑞雲宮亦未可知

清行宮 縣西南四十里半壁店村北背山面河形勢幽勝清乾隆元年奉安世宗憲皇帝于泰陵易州泰寧山太平峪每謁陵道由房山十三年遂于半壁店建行宮焉舊設千總一外委一旂兵二十綠營設經制一外委一漢兵十名以爲守衛之用今清社已屋遺族亦等於編氓矣故宮半圯禾黍離離恐不數年將爲瑞雲磐寧之繼

人世升沈曷勝浩嘆（民國十四年清室伐資宮樹所有宮殿由縣議立公學

大樓溝大樓 縣西北二十里羊耳峪西塔兒溝樓在溝口內高六七仞疊石而成四

面有門中穿一井明末邑人避亂溝中以板蓋井以便出入別無岐路撤去木板外

人不能進有一夫當關之勢今名大樓溝蓋由于此

張坊鎮樓 縣西南七十里張坊街北樓三層門南向高可數丈下層空其中甚暗下

有隧道向西北約二里通任家墳俗傳任爲閣老由下層樓上中層半途轉折處有

井一相傳其井中設有刀山劍樹顛而入無生理中塑碧霞元君像上層可遠眺上

中兩層亦通隧道

三角山 三角山在王家台西北距縣可百餘里三峯鼎立惟東南一峯可上山高頂

平上有石城遺趾東南坡有井一眼南高寬北低窄約可百畝北界秋林堡西界四

馬台舊謂西界鷄兒台誤俗傳劉武周在此爲寇當是劉仁恭之誤或言馮銓避暑

于此自此東行至霞嶺南入安子溝至關上爲出山之隘口

關上 在張坊西北二十里南一里有舊城墻一道北十五里即佛嶺嶺西北八里至石門溝再西北十里卽口子澗霞嶺地關上控南北咽喉東至黑牛水約三里由黑牛水東南經東城寺可至鼇頭寨

鼇頭寨 又名般洲山在東城寺東南四圍斗絕而頂則坦平明嘉靖緒城記云般洲山實南北相控之咽喉羣盜未平時盤結其中不時竊發按其上有井有碑碑載明崇禎間北鄭村廩生張汝器因闖賊之亂聯絡涿房兩縣五十餘村築寨于此

養恬齋筆記云三角城在北關上城在中般洲山寨在南皆大山前後形勝之地而畿輔通志並闕邑志于關上城示闕三角僅載山名般洲稍詳亦無徵實訪之邑人或云劉武周屯兵處或言劉盆子以予考之乃劉仁恭山後八軍也新五代史雜傳載李承約薊州人少事劉仁恭爲山後八軍巡檢將騎兵二千仁恭爲其子守光所囚承約以騎兵奔晉盧文進范陽人爲劉守光騎將降唐莊宗以屬其弟存矩存矩爲新州團練使統山後八軍莊宗與劉郾相拒于萃募山後勁兵數千課民出馬以

十牛易一馬山後之民皆怨兵又不樂南行至祁溝關謀爲亂文進因兵亂復反唐殺存矩此山後八軍故事也僭僞亦有建置三角等城寨應即在八軍數中因正史不詳斯無徵耳劉武周父匡自景城徙馬邑武周爲馬邑人考唐書終身未嘗至房其將宋金剛爲賊時嘗保西山後歸武周亦終不復返且未知西山究在何地盆子事更遠在黃河以南俗說訛傳因同屬劉姓故誤

黑龍關 縣西北五十里左右皆山下臨絕澗山上有關城遺趾山下即青龍潭俗名白城灣深不可測澗東一路僅通駝馬北通齋堂出長城舊駐軍防爲沿河口所轄房山置之于管轄之外藏奸聚賭不但爲政治之梗亦非所以固疆宇也

桃葉渡口 在縣西二十五里黃山店村南山勢同黑龍關峰側煙墩遺址尙存西北越蔡樹鞍經南北窖至紅煤廠卽與黑龍關往齋堂之路合

乾河口 在縣西南八十里山高水深易于控扼從南流河越關上城卽可以通山後霞嶺等處從穆家口子經十度越大龍門卽可通蔚州桃花而至外邊

竊按黑龍關與三角山皆在大房西北同在聖水溝壑之中關上城與桃葉口在大房山東西爲入聖水溝壑所必經之要路山後八軍果如養恬齋筆記言也竊謂黑龍關桃葉口尤要于般洲山之鼇頭塞蓋鼇頭塞與山後交通不便呼應不靈爲一時草竊則有餘以日久相持則不足高公以鼇頭塞爲形勝之地實八軍之扼要而獨未及于桃葉黑龍余竊感焉若乾河口則另一區域關于涿涑者甚巨關于房邑者甚輕則又研究形勢者所當知也

大安山

方輿紀要云大安山在縣北

實是西北

山高險薛居正曰大安幽州西名山也名

勝志云大安山龍泉河出焉大清一統志大安館在房山縣西北大安山劉仁恭師方士王若訥于此唐書劉仁恭倚燕強且遠無所憚意自滿從方士王若訥學長生築館于大安山掠子女以充之又招浮屠與講法以堽土爲錢飲真錢穴山藏之殺匠滅口禁南方茶自採山爲茶號山曰大恩以邀利

原名大安改名大恩

五代史仁恭驕于富

貴築宮于大安山選燕美女充其中又與道士鍊丹藥冀可不死令燕人用堽土爲

錢悉歛銅錢穴山藏之已而殺其工以滅口後人皆莫知其處通鑑仁恭慮出州城不固築館于大安山曰此山四面懸絕可以少制衆其棟宇壯麗擬于王者（按今原山是其地而基址無存）又五代史仁恭有愛妾其子守光悉之仁恭怒笞守光逐之梁開平元年遣李思安攻仁恭仁恭在大安山守光自外將兵入走思安乃自稱盧龍節度使遣李小喜元行欽以兵攻大安山執仁恭而幽之又王思同傳思同母仁恭女也劉守光攻仁恭于大安山思同以部下歸唐遼史統和十四年三月鑿大安山取劉守光一作仁恭所藏錢散諸五計司令今大安山村北有原山相傳爲劉仁恭修宮處西有西陵台傳爲仁恭墓其村東南將近紅煤廠路東山環處有平地約數頃俗名操場傳爲仁恭練兵處大安山南有長操村俗亦謂仁恭練兵處大安山東南有佛子莊村外有山甚高名煙筒尖俗傳是仁恭設立烟墩黑龍關有舊城墻一段在白城灣上想亦是仁恭所築惟西陵台之仁恭墓似難徵信考五代史後唐莊宗本紀天祐十年正月十五日壬子遣大將李存霸拘逸仁恭于代州刺其心血

奠告于武皇陵然後斬之劉守光傳亦言守光被誅于雁門山下是父子皆死于晉省誰收其骨歸葬者且大安非故里又何必歸葬于大安乎如欲曲爲之解或是仁恭妻妾私人死于大安山被攻之日有人權葬于此土人不知誤以爲仁恭之墓亦未可知

大房山 唐書地理志良鄉西有大防山太平寰宇記大房山在良鄉西北三十五里山下有石穴(孔水洞)又有小防山至大防山相近隋圖經注防山上有仙人玉堂水經注大防嶺山下有石空東北洞開房皆作防遼史涿州永泰軍有大房山元至正二十七年更名奉先爲房山縣大清一統志房山下有聖水泉防改爲房矣

五代史唐莊宗天祐十四年契丹周德威于幽州莊宗遣李嗣源救之同李存審會兵七萬銜枚東甲八月甲午自易州北循澗而行嗣源率三千騎爲先鋒庚子循大房嶺而東契丹萬騎俱至嵐源敗之通鑑梁貞明三年秋遼圍幽州城中危困李嗣源閣寶李存審步兵七萬自易州北行踰大方嶺循澗而東嗣源與養子從珂將三

千騎爲前鋒與遼遇遼兵驚却晉兵翼而隨之遼兵行山上晉兵行澗下每至谷口遼兵輒要之嗣源父子力戰乃得進至山口遼以萬騎遮其前嗣源躍馬奮撻三入其陣斬遼酋兵一人後軍齊進遼兵卸晉兵始得出至幽州春明夢餘錄宋垂拱中吏部尙書宋琪上疏請復幽燕其略曰循山之北涑水以西挾山而行援糧而進涉涑水並大房抵桑乾河出安禮寨此是周德威收燕之路然終宋之世未嘗復也

摘星陀 上方山內峯之最高者名摘星陀記纂淵海摘星嶺在府西高入雲霄光啓時遼人侵幽州劉仁恭窮師踰摘星嶺追之又名齋星陀阮旻錫上方山記峯最尊者爲齋星陀華嚴于此齋星曰摘星訛耳僧巢其顛下如飛鳥然

六聘山 一統志六聘山在房山西三十里名勝志大房山南近霍原隱處水經注徐廣云原隱居廣陽山教授數千人晉書霍原休明燕國廣陽人元康末與王褒等俱以賢良徵累下州郡以禮發遣皆不到後王浚稱制謀僭使人問之原不答浚心銜之時有謠曰天子在何許近在豆田中浚以豆爲霍收原斬之懸其首諸生悲哭夜